

Tingkat kesediaan digital PMKS keperluan utama

Oleh [Hazwan Faisal Mohamad](#) - Oktober 25, 2021 @ 4:44pm
hazwanfaisal@mediaprima.com.my



- Gambar hiasan

KUALA LUMPUR: Terdapat keperluan mendesak untuk meningkatkan kesediaan digital dalam kalangan perusahaan mikro, kecil dan sederhana (PMKS) ASEAN, kata Datuk Seri Ismail Sabri Yaakob.

Perdana Menteri berkata, ini berikutan adalah jelas sekali PMKS yang kekurangan akses kepada teknologi berdepan risiko paling besar untuk ketinggalan dalam era pasca pandemik.

"Sempena dengan Sidang Kemuncak ini, ekosistem sedia ada di semua negara ASEAN juga harus diperkukuhkan, sementara beberapa bidang amat memerlukan penyelarasan terhadap dasar-dasar tertentu," katanya.

Beliau berkata demikian ketika menyampaikan ucap-tama pada Sidang Kemuncak Pelaburan Perniagaan ASEAN 2021, hari ini.

Yang turut hadir Pengerusi Lembaga Penasihat Perniagaan ASEAN 2021, Dr Ar Siti Rozaimeryanty Abd Rahman.

Perdana Menteri turut mengutarakan tiga cadangan resolusi berkaitan menyepadukan digitalisasi dalam ASEAN antara lain dengan membina infrastruktur digital yang inklusif.

Katanya, adalah penting bagi setiap negara ASEAN untuk memupuk infrastruktur digital yang benar-benar mudah diakses dan berpatutan untuk semua.

"Dalam keadaan ini, Malaysia telah berusaha untuk meningkatkan infrastruktur asas, dengan pelancaran inisiatif Pelan Pembangunan Digital Malaysia (atau MyDIGITAL) awal tahun ini bersama-sama dengan Revolusi Industri Keempat (4iR).

"Sasaran kami adalah untuk mengubah negara menjadi ekonomi berpendapatan tinggi yang didorong oleh teknologi, sambil meningkatkan infrastruktur digital untuk hubungan yang lebih lancar dan meluas.

"Aspirasi ini kini sedang direalisasikan oleh pelan tindakan Rangkaian Digital Nasional (JENDELA), dengan peruntukan kira-kira AS\$6.7 bilion," katanya.

Cadangan kedua katanya, adalah dengan mempromosikan literasi digital inklusif dan untuk tujuan ini, Malaysia telah menekankan untuk mengembangkan bakat digital yang bersedia siaga di masa depan sebagai salah satu strategi yang digariskan di bawah Rancangan Malaysia Kedua Belas yang baru dibentangkan.

"Di bawah pelan ini, langkah berterusan dalam peningkatan kemampuan digital dan keterampilan literasi digital akan dilakukan dalam memastikan kerelevanan tenaga kerja pada setiap masa.

"Malaysia secara konsisten mengembangkan latihan industri, termasuk Latihan Pendidikan Teknikal dan Vokasional, Penyelidikan dan Pembangunan, serta Pengkomersialan dan Inovasi," katanya.

Ismail Sabri berkata, cadangan ketiga ialah dengan meningkatkan PMKS supaya bersedia dari segi digital.

"Mengenai cadangan ini, Malaysia telah memperhebatkan intervensi dasar, yang secara khusus disasarkan untuk meluaskan keluasan dan kedalaman penerimaan digitalisasi oleh PMKS kami.

"Pendekatan ini amat penting buat Malaysia, kerana PMKS menyumbang lebih daripada 90 peratus perniagaan dalam ekonomi ASEAN. Tanpa persiapan dan tindakan yang sewajarnya, kita boleh menjadi antara yang paling teruk terkesan dengan pandemik ini pasca wabak.

"Oleh itu, penggunaan teknologi digital yang berjaya adalah penting untuk pemulihan yang konsisten dan pemulihan ekonomi yang mampan. Sehingga kini, kami berkembang maju secara konsisten dalam meluaskan akses pasaran PMKS, sambil membina ekonomi digital yang inklusif," katanya.